

## 'Terima skrol diploma daripada bos hadiah paling bermakna'

Oleh [Ruwaida Md Zain](#) - Ogos 11, 2024 @ 8:55am  
[bhnews@bh.com.my](mailto:bhnews@bh.com.my)



Pengerusi Kumpulan Media Prima Berhad merangkap Pengerusi Jawatankuasa Penasihat Industri (JPI), Datuk Seri Dr Syed Hussian Aljunid (kiri) menyampaikan diploma kepada Ahmad Aqil Nuruddin Ahmad Nazri pada Majlis Konvokesyen Politeknik Sultan Salahuddin Abdul Aziz Shah Ke 25 di Dewan Al Jazari, Politeknik Shah Alam. - Foto NSTP/Faiz Anuar

SHAH ALAM: Tidak pernah terlintas di fikiran seorang graduan Diploma Pengajian Perniagaan dari Politeknik Sultan Salahuddin Abdul Aziz Shah (PSA) yang dia akan menerima skrol diplomanya daripada ketua tempat dia bekerja.

Bagi Ahmad Aqil Nuruddin Ahmad Nazri, 22, dapat berdiri bersama Pengerusi Kumpulan Media Prima Berhad, Datuk Seri Dr Syed Hussian Aljunid di pentas konvokesyen adalah satu penghormatan dan pengalaman berharga.

"Selama hampir dua tahun saya bekerja dengan Datuk Seri, saya tidak pernah menyangka dapat mendekati Datuk Seri dengan seakrab ini. Tidak pernah terlintas yang saya akan menerima skrol diploma saya dari bos sendiri, ketika itu perasaan saya gembira, gementar, takut dan terharu.

"Ini satu penghormatan besar kepada saya dan keluarga apabila Datuk Seri sendiri yang menyerahkan skrol diploma kepada saya sebentar tadi (petang semalam). Saya menganggapnya sebagai hadiah paling bermakna dan memori yang tidak akan dilupakan sepanjang hidup saya," kata Pegawai Khas (Eksekutif) kepada Syed Hussian itu.

Syed Hussian yang juga Pengerusi Jawatankuasa Penasihat Industri (JPI) dijemput sebagai tetamu kehormat bagi menyempurnakan Sidang 2 Majlis Konvokesyen PSA Kali ke-25 di Dewan Al-Jazari, di sini, petang semalam.

Syed Hussian menyampaikan skrol kepada 403 graduan Jabatan Kejuruteraan Awam dan Jabatan Perdagangan bagi sesi kedua petang semalam termasuk kepada Ahmad Aqil.



Ahmad Aqil Nuruddin Ahmad Nazri (tengah) bersama ahli keluarganya selepas menerima diploma pada Majlis Konvokesyen Politeknik Sultan Salahuddin Abdul Aziz Shah Ke 25 di Dewan Al Jazari, Politeknik Shah Alam, semalam. - Foto NSTP/Faiz Anuar

Menurut Ahmad Aqil, antara pencapaianannya di PSA adalah dilantik sebagai Majlis Perwakilan Pelajar (MPP) dan menyandang jawatan EXCO Multimedia selain

juruacara bagi Jabatan Perdagangan dan Anugerah Jabatan Perdagangan (AKJ) dan 'podcaster' untuk Podcast JPG PSA.

"Ilmu dan kemahiran sepanjang pengajian selama dua tahun enam bulan di PSA saya gunakan sebaik mungkin sewaktu menjalani Latihan Industri (LI) selama enam bulan di Media Prima Berhad sebelum ditawarkan sebagai Pegawai Khas Datuk Seri bermula Jun tahun lalu.

"Saya akan terus bekerja dengan lebih baik untuk mencapai matlamat serta membanggakan kedua ibu bapa. Insya-Allah, saya akan sambung pengajian ke peringkat ijazah Sarjana Muda secara separuh masa tahun hadapan," katanya.

Pada majlis konvokesyen kali ini juga, graduan Diploma Kejuruteraan Elektronik (Komunikasi), Wong Guan Cheng yang menjadi penerima Anugerah Ketua Jabatan lima semester berturut-turut dan memperoleh CGPA 3.98 mendapat penganugerahan paling utama iaitu Anugerah Pengarah.

"Saya memilih politeknik sebab saya yakin dengan politeknik di samping lebih berminat dengan program kemahiran yang bersifat praktikal berbanding akademik. Kebetulan ketika itu, ayah hilang kerja ketika pandemik COVID-19. Saya tengok yuran pun murah, jadi saya pilih politeknik sebagai pilihan utama.

"Antara pencapaian dan anugerah lain yang saya terima adalah pingat emas di Pertandingan Akhir Projek Pelajar Jabatan Kejuruteraan Elektrik 2023 dan penerima Diamond Award, top 5 Best Special Award dan Gold Medal di dalam Virtual Innovation Competition 2024.

"Saya juga diberi tanggungjawab sebagai pengarah program Mini Tournament PUBG JKE 2024; Majlis Perwakilan Pelajar Jabatan Kejuruteraan Elektrik, Tahun 2022/2023 dan Pengarah Program (Pelajar), Seminar Emerging Trends in Industrial IoT and Machine Learning, 2022," katanya.

Ahmad Aqil dan Guan Chengg antara 833 graduan yang menerima ijazah, diploma serta sijil pada majlis konvokesyen kali ini.